

## Na bibuti ya kele na mwana ndundu (albino),

### MAMBU YA MFUNU YA BENO FWETI BAKISA:

#### **Mwana na nge kele lusakumunu ya Nzambi.**

Nzambi me sakumuna nge na mwana ndundu (albino), to na mpila ya mbote beto lenda tuba, mwana ya kele na albinisme. Konso mwana kele lusakumunu ya Nzambi. Ebuna, Yandi me sakumuna beno na mwana yai.

#### **Mwana na nge kele na maladi ve. Kaka yandi kele kulere ya luswaswanu ti bana ya nkaka ya Afrika.**

Albinisme yina, yo ke songa ve nde mwana na nge kele malade. Yandi kele na 'kondisio' albinisme. 'Kondisio' kele ve maladi. Yo ikele kaka mpila ya kuvanda. Yo kele ve mambu ya bamikrobi to bavirusi to mambu bonso yo. Ikele ve. Yo kele maladi ve ata fioti. Mwana na nge bakaka ve mpusu ya mbwaki sambu yandi me zwa maladi. Yandi mpi lenda ve pesa kondisio yina na bantu ya nkaka, ata yandi vanda penepene na bo.

Nge lenda simba mwana na nge. Nge lenda vanda penepene na yandi. Kana yandi kele mwana-fioti, nge lenda pesa yandi dibebe. Yandi kele na maladi ve, ti yandi lenda pesa nge kindundu na yandi ve. Bana ya nkaka lenda simba yandi. Bo lenda lala mbeto mosi ti yandi. Bo ta baka kindundu na yandi ve.

#### **Mwana na nge kele lusakumunu ya Nzambi; yandi kele lusilu ya mbi ve.**

Albinisme (kindundu) ke kwisaka ve na nzila ya bampeve ya mbi to banzambi ya nkaka. Yo ke kwisaka ve na nzila ya lusilu to magi. Yo mpi ke pesa fami lusilu ve kana bo vanda na mwana ya ndundu. Yo mpi ke songa ve nde bibuti me sala mbi. Ata bakristo ya mbote-mbote, bo mpi lenda vanda na bana ya ndundu.

Konso mwana kele lusakumunu ya Nzambi. Kuvanda na mwana ndundu, yo ke songa ve nde mambu ya mbi fweti salama na kati ya fami. Kana bampasi ikele, yo ikele ve mwana ya ke sala nde mpasi yina fweti salama. Konso ntangu, mwana kele kaka lusakumunu ya Nzambi.

Kindundu ke kwisa ve sambu nkento to sambu bakala ya fami me sala bizumba. Yo ke songa mambu ya bizumba ve. Yai kele mwana NA BENO, mwana spesial, mwana ya luzolo, lusakumunu ya Nzambi. Mwana kele lusakumunu, kieleka, kansi yandi ta vanda na baproleme ya ke kwisaka ti yandi. Yandi ke na mfunu ya luzolo, kuyamba, ti lusadisu ya bibuti yonso zole kana mpila ikele. Yandi ke na mfunu ya luzolo na BENO.

### **Sambu na nki mwana na nge kele ndundu ?**

Nzambi zola bima ya mutindu mingi. Yandi sadilaka bantu ya bakulere mingi ti ya mutindu mingi kuzinga na ntoto yai. Ee, ti Yandi zola bo yonso. Nzambi salaka nge, ti Yandi salaka mwana ya nge, mpi.

Albinisme to kindundu kele kondisio beto binga ‘jenetike.’ Yai zola tuba nde mwana baka yo na nzila ya mama ti papa ti bambuta na ntwala na bo. Kansi, beto zaba nde, Nzambi kele kutwadisa mambu yonso bonso kele luzolo na Yandi. Yandi zolaka ve nde bintuntu yonso monika kiteso mosi. Keti bakuleur ya bintuntu mutindu na mutindu, yo ke pesaka beto kiese? Ee, yo ke pesaka kiese.

Kiteso mosi, Nzambi zola nde bana kuvanda bakulere mutindu na mutindu. Konso kulere kele mbote ti kitoko, sambu Nzambi gangaka bakulere yina yonso, mpi bana ya bakulere yina yonso.

### **Sambu na nki bantu ya nkaka lenda vanda na boma na mwana albino ?**

Kana ndambu ya bantu kele na boma na mwana na nge, yo kele sambu bo bakisa ve albinisme (kindundu) kele nki.

Mbala mingi, bantu kuwa boma kana bo bakisa mambu ve. Bo lenda yindula nde, mbala ya nkaka mwana na nge kele na maladi. Yo yina, bo kuwa boma nde, kana bo simba yandi, bo ta baka maladi yina mpi. Kansi yina kele kieleka ve ata fioti. Kisalu na nge kele kulonga bo, kutendula bo sambu bo bakisa.

Kana bo bakisa ve, bo lenda yindula nde mwana ya nge kele na lusilu ya me katuka na bampeve ya mbi. Kansi yina kele kieleka ve. Nzambi zola mwana ya nge. Yandi me sakumuna beno na mwana yai.

Mwana ya nge ke monika lusaswanu na mambu ya nkaka, bonso kulere, bonso meso, bonso nsuki. Yai kele kieleka, kansi yandi kele bonso bana ya nkaka na bampila yonso ya nkaka.

### **Mwana na nge lenda vanda na luzingu ya mbote.**

Bantu mingi albino, ntangu bo me yela, bo me kuma bantu ya nene ya me sala mambu mingi ya mfunu. Bo me kuma bantu ya yimba mbote, bantu ya leta, bantu ya komerse. Na lusadisu ya Nzambi, mwana na nge lenda sala konso yina ya bantu ya nkaka ke sala. Kinundu na yandi fweti kanga yandi nzila ve.

Bantu mingi ya ndundu, bo kele mayele mingi. Bo lenda longuka bonso bantu ya nkaka. Bo lenda kwenda na nzo-nkanda, ti bo lenda sala mbote kulonguka. Bana ya nkaka kele na mpila kumona ve mbote kana kima kele mwa-ntama. Kana mwana na nge ke sala mbote ve na nzo-nkanda, mbala ya nkaka yandi lenda mona ve bisono ya kele na zulu ya dibaya ya mpemba. Nge lenda solula ti longi na yandi. Kana bo tula yandi penepene na dibaya ya mpembe, mbala ya nkaka yo lenda sadisa. Zikisa nde yandi lenda mona mikanda na yandi ya kalasi, mpi. Mbala ya nkaka yo lenda sadisa yandi.

**Mwana na nge lenda zinga luzingu mosi ya nda.**

Bantu ndundu, bo lenda zinga luzingu mosi ya nda. Bo lenda lungisa bamvula mingi. Kindundu na bo ke fwaka bo ve. Kaka mpasi mosi kele na bana albino, yo lenda vanda kanser ya mpusu. Beto ta songa beno bampila ya lenda sadisa mambu yai na ntangu fioti.

**Makambo zole ya ke tadila bana albino—Nge lenda sadisa !**

Bana albino, bo ke mona makambo zole, ti nge lenda sadisa bo na bamakambo yina.

Ntete, mbala mingi, meso ya bana albino kele ve na melanine na kati ya meso na bo. Yo ikele yo ya ke pesa kulere na meso, yo mpi kele yo ya ke kebisa meso na mpila nde bo kuyoka ve nswalu. Meso ya mwana albino ke zola ve mwini ya ngolo. Yo yina, ntangu lenda pesa yo mpasi bonso ya kuyoka. Mwana lenda keba meso kana yandi ta lwata baluneti ya ndombe (solere) konso ntangu yandi kele na nganda. Yai kele mfunu mingi kana ntangu kele na zulu, ti yo ke pela ngolo. Diaka, mwana lenda lwata mpu ya kele na ba-borde ya nene na lweka na yo yonso, sambu mpu ya mutindu yina ya pesa ndambu madidi na meso, ti yo ta keba mpi makutu.

*[Longi, kana nge kele na luneti solere kupesa mwana, nge lenda yika bandinga yai :]*

Bakristo ya zola Yesu, bo me tindila mwana na nge makabu ya luneti solere yai. Beto ke na kivuvu nde yo ta sadisa ti keba meso ya mwana na nge. Beto ke pesa yandi makabu yai kusonga beno nde kieleka Nzambi zola beno ti mwana na nge. Yandi zola nde mwana na nge, ti beno mpi, kuvanda na luzingu ya mbote, mpi kukuma banduku na Yandi mvu ya mvu.

Baluneti solere lenda sadisa meso ya mwana na nge nde ntangu kuyoka meso ve. Kansi meso na yandi lenda vanda na bamambu ya nkaka, mpi. Kana mwana ke na mpasi kumona na nzo-nkanda, nge lenda solula na longi na yandi. Lomba kana mpila ikele nde yandi vanda penepene na dibaya ya mpembe. Tendula longi nde mbala ya nkaka, mwana na nge fweti simba mukanda penepene na

meso na yandi, mpi. Kana nge ke na yo mfunu, MCE lenda pesa beno nkanda ya kutendula mambu yai kulomba longi na kusadisa.

Makambo ya zole, bonso mpusu ya mwana kele na melanini ve ya kukeba yo na ntangu, mpusu na yandi mpi lenda yoka nswalu. Na mambu yina, bamputu lenda kuma nswalu na mpusu na yandi, balevre na yandi, ti zulu parti ya makutu na yandi. Mambu ya mawa kele nde bana mingi baka bamputu, ata kansere ya mpusu, sambu mpusu na bo ke konda melanini sambu na kukeba yo.

Nki mutindu beno lenda sadisa ? Beno lenda sadisa mwana kusala ve na ntangu kiteso ya 10h na suka tii na 16 h na nkokila. Yandi lenda sala na kati ya nzo to na nsi ya madidi ya nti na ntangu yina. Bisalu na nganda, bana lenda sala yo na suka yonso, to na nkokila na nima ya 16 h. Ntangu yina, ntangu ke bula mingi-mingi ve.

Beno lenda sadisa kubenda mwana kulwata bilele na diboko ya nda ti na makulu ya nda, bilele ya fika nitu mbote. Bilele ya kotonni ya kulere mpembe lenda sadisa, sambu yo simba ve ntangu, kansi yo buya yo.

Mpu ya kele na borde ya nda, yo ke pesa madidi na luse ti na makutu. Yai ta sadisa mingi. Kana yo ikele, mafuta speciale ikele ya ke buya ntangu sambu yo yoka mpusu nswalu ve. Mwana pakula mafuta yai na nitu na bisika ya yandi lenda fika nitu ve na lele. Yandi pakula yo mbote na zulu ya makutu ti mbombo.

ATASIO !! Yandi tula yo VE na kati na meso! Mafutu ya nkaka, bonso mafuta ngasi, mafuta ya kulamba, to mafuta ya koko, yo ta buya ntangu ve. Yo fweti vanda mafuta special ya buya ntangu.

Ata mafuta ya koko ke buya ve ntangu, yo kele mbote sambu na mpusu ya mwana. Yo lenda sadisa mpusu ya me yoka dezia sambu yo beluka diaka. Mwana lenda sadila yo na mpimpa to na bilumbu ya mvula ke noka, to na ntangu yandi ta vanda na kati ya nzo.

Nge lenda lomba longi nde mwana na nge kusala ve bafizike ya kele na nsi ya ntangu. Mwana lenda sala bafizike ya nkaka na nsi ya madidi. Kana mfunu ikele, MCE lenda pesa nge lettre ya kutendula mambu yai na longi to directeur ya nzo-nkanda sika mwana ya nge ke longuka.

**Nzambi zola beno bibuti, ti Yandi zola bana yonso ya beto mpi.** Bambuka konso ntangu nde, Nzambi zola beno, ti yandi zola bana yonso ya beno, mpi. Yandi zola mwana ya beno albino! Mwana na beno kele lusakumunu special me katuka na Yandi. Beno kele ya mfunu na Nzambi, ti mwana na beno albino kele mfunu mpi na meso na Yandi. Yandi zola mwana na beto kaka mpila yandi kele. Mwana yina lenda sakumuna fami na beno, bwala yonso, nsi yai ya Congo yonso, ata ntoto ya mvimba.

**Keba mwana na nge na mambu ya kuseka ya bantu ya nkaka.** Bantu ya nkaka ya bakisa ve albinisme, bo lenda seka beno to mwana na beno. Bo lenda tuba na mpila ya ke pesa mpasi na ntima. Bo lenda tuba bima ya mbi mingi, ti bo lenda kwikila nde mambu ya bo ke tuba kele kieleka. Kana bo seka nge, to mwana na beno, to fami, nge songa bo nde mpila bo ke sala kele kitoko ve. Songa bo nde mwana na beno kele mwana bonso bo, ata yandi kele na kulere ya mpembe to ya mbwaki. Kuseka mwana lenda bebisa mabanza na yandi ti kimuntu na yandi na mpila ya ta sadisa yandi ve. Kuseka ya mutindu yina, yo lenda kanga kuyela ya mwana na mabanza na yandi. Yo lenda kanga yandi nzila kukuma to kuvanda yonso ya zolaka vanda possible. Kana beno tuba kima ve kubuya kuseka yina, mwana ya beno ta mono bonso yandi me bikala yandi mosi, bonso yandi ke na muntu kusadisa yandi ve. Bumosi ya nene! Kansi, kana beno buya kuseka yina ti nganina bantu ya ke sala yo, yandi ta bakisa nde yandi kele ve kaka yandi mosi, kansi bantu ya nkaka mpi kele sambu na yandi.

**Kupesa mwana ya beno kikesa—yandi kele lusakumunu.**

Bantu ya nkaka, bantu ya zaba mambu mingi ve, bantu ya bakisa ve konditio yai albinisme (kindundu), bo lenda mona mwana ya beno bonso lusilu ya magi. Mfunu ikele kuditubila nge mosi diaka ti diaka nde, konso mwana kele lusakumunu. Beno yamba mwana na beno, beno mpi songa luzolo sambu na yandi. Yai ta sadisa mwana kuluta mambu yonso ya beno lenda sala.

*[Longi, yula bibuti kana bo zaba Yesu Kristo bonso Mvulusi na bo. Kana mpila ikele, meka kutwadisa bo na Yesu.]*

**KETI BENO KELE NA BANGIUFULA YA NKAKA?**

Nki bangiufula ya naka beno ke na yo na mambu ya beto me solula? Nki bakestio ya nkaka beno ke na yo na mambu yai ya kindudu?

Nki bampasi mwana na beno me mona sambu yandi kele albino ?

Nki bampasi beno me mona kusansa yandi?

Keti beno kele na mambu ya nkaka beno zola kutuba?

‘Ministeres pour Chaque Enfant’ (ONG)

e-mail : [ecmafrica@ecmafrica.org](mailto:ecmafrica@ecmafrica.org)